

傷

寒

論

傷寒論卷第六

漢張仲景著

晉王叔和撰次

宋成無已註

錢塘張卿子叅

辨太陰脉證并治第十

太陰之爲病腹滿而吐食不下自利益甚時腹自痛  
若下之必胸下結鞭。

太陰爲病陽邪傳裏也太陰之脉布胃中邪氣壅  
而爲腹滿上不得降者嘔吐而食不下下不得升  
者自利益甚時腹自痛陰寒在內而爲腹痛者則

爲常痛此陽邪干裏雖痛而亦不常痛但時時腹  
自痛也若下之則陰邪留於胸下爲結鞭經曰病  
發於陰而反下之因作痛

王三陽云此風寒中於太陰經非陽邪傳裏也若  
陽邪傳裏正當下之何結鞭之有況痞字與鞭字  
亦自分別邪之初起必先入經而後入腑臍此邪  
中太陰經其病猶在上膈非中臟腑之陰證也當  
用辛甘之藥溫散之則邪散去而自和矣今誤下  
之則邪氣乘虛入胸膈間作鞭耳

黃仲理云宜理中湯陰經少有用桂枝者如此證若肺浮卽用桂枝湯微汗之若惡寒甚不已者非理中四逆不可。

太陰中風四肢煩疼陽微陰澁而長者爲欲愈。

太陰脾也主營四末太陰中風四肢煩疼者風澁末疾也表邪少則微裏向和則澁而長長者陽也陰病見陽脈則生以陰得陽則解故云欲愈。

太陰病欲解時從亥至丑上。

脾爲陰土主於丑亥子向陽故云解時。

太陰病脉浮者可發汗宜桂枝湯

經曰浮爲在表沉爲在裏太陰病脉浮者邪在經也故當汗散之

王宇泰云在太陽則脉浮無汗宜麻黃湯此脉浮當亦無汗而不言者謂陰不得有汗不必言也不宜麻黃而用桂枝者以陰病不當更發其陽也須識無汗亦有用桂枝證

自利不渴者屬太陰以其藏有寒故也當溫之宜

四逆輩

自利而渴者屬少陰。爲寒在下焦。自利不渴者屬太陰。爲寒在中焦。與四逆等湯以溫其藏。

張兼善云。經言輩字。謂藥性同類。惟輕重優劣不同耳。四逆湯。甘辛相合。乃大熱之劑。苟輕用之。恐有過度之失。所以仲景不爲定擬也。莫若以理中循循而用之。至爲穩當。

傷寒脉浮而緩。手足自溫者。繫在太陰。太陰當發身黃。若小便自利者。不能發黃。至七八日。雖暴煩下利。日十餘行。必自止。以脾家實。腐穢當去故也。

太陰病至七八日太便鞭者爲太陰入府傳於脾  
明也今至七八日暴煩下利十餘行者脾家實腐  
穢去也下利煩燥者死此以脾氣和逐邪下泄故  
雖暴煩下利日十餘行而利必自止

本太陽病醫反下之因而腹滿時痛者屬太陰也桂  
枝加芍藥湯主之

表邪未罷醫下之邪因乘虛傳於太陰裏氣不和  
故腹滿時痛與桂枝湯以解表加芍藥以和裏

桂枝加芍藥湯方 第八十三

於桂枝湯方內更加芍藥三兩隨前共六兩餘依

桂枝湯法

大實痛者桂枝加大黃湯主之

大實大滿自可除下之故加大黃以下大實

桂枝加大黃湯方 第八十四

桂枝

三兩  
去皮

大黃

二兩

芍藥

六兩

生薑

三兩

甘草

二兩

大棗

十二枚

右六味以水七升煮取三升去滓溫服一升日三服

婁氏云用四逆輩固所當然復用桂枝大黃夫夫



黃大寒何爲用于陰經又兼桂枝寒熱相雜何也  
曰自利而渴者屬少陰爲寒在下焦自利不渴者  
屬太陰爲寒在中焦以四逆等湯溫其藏此本經  
常用之藥也其太陽病反下之表邪未解乘虛傳  
於太陰因而腹滿時痛大實痛者桂枝加芍藥大  
黃爲宜

趙嗣真云太陰腹滿證有三有次第傳經之邪有  
直入本經之邪有下後內陷之邪不可不辨

太陰爲病脈弱其人續自便利設當行大黃芍藥者

宜減之。以其人胃氣弱，易動故也。

腹滿痛者，太陰病也。脈弱其人續自便利，則邪雖在裏，未成大實，欲與大黃芍藥攻滿痛者，宜少與之，以胃氣尚弱，易爲動利也。

辨少陰病脈證并治第十一

少陰之爲病，脈微細，但欲寐也。

少陰爲病，脈微細，爲邪氣傳裏深也。衛氣行於陽，則寤；行於陰，則寐。邪傳少陰，則氣行於陰而不行於陽，故但欲寐。

少陰病欲吐不吐心煩但欲寐五六日自利而渴者屬少陰也。虛故引水自救。若小便色白者少陰病形悉具。小便白者以下焦虛有寒不能制水故令色白也。

欲吐不吐心煩者表邪傳裏也。若腹滿痛則屬太陰。此但欲寐則知屬少陰。五六日邪傳少陰之時。自利不渴者寒在中焦屬太陰。此自利而渴爲寒在下焦屬少陰。腎虛水燥渴欲引水自救。下焦虛寒不能制水小便色白也。經曰下利欲飲水者以

有熱故也。此下利雖渴然以小便色白明非裏熱不可不察。

王三陽云此寒中陰經而傳入陰臟者雖引水自救浮陽在上也。若有大渴方可論陽邪傳陰熱證。病人脈陰陽俱緊反汗出者亡陽也此屬少陰法當咽痛而復吐利。

脈陰陽俱緊爲少陰傷寒法當無汗反汗出者陽虛不固也故云亡陽以無陽陰獨是屬少陰內經曰邪客少陰之絡令人噤痛不可內食少陰寒甚。

是當咽痛而復吐利

少陰病欬而下利譫語者被火氣劫故也小便必難  
以強責少陰汗也

欬而下利裏寒而亡津液也反以火劫強責少陰  
汗者津液內竭加火氣煩之故譫語小便難也

少陰病脉細沉數病爲在裏不可發汗

少陰病始得之反發熱脉沉者爲邪在經可與麻  
黃附子細辛湯發汗此少陰病脉細沉數爲病在  
裏故不可發汗

王三陽云。此無發熱證。故不可汗。

少陰病。脉微不可發汗。亡陽故也。陽已虛。尺脉弱。瀼者。復不可下之。

脉微爲亡陽。表虛不可發汗。脉弱瀼爲亡陽裏虛。復不可下。

王三陽云。脉弱瀼瀼者。陰也。瀼爲血少。乃亡陰也。故不可下。陽字誤。

少陰病。脉緊至七八日。自下利。脉暴微。手足反溫。脉緊反去者。爲欲解也。雖煩下利必自愈。

少陰病脉緊者寒甚也。至七八日傳經盡欲解時。自下利。脉暴微者。寒氣得泄也。若陰寒勝正陽虛而泄者。則手足厥而脉緊不去。今手足反溫。脉緊反去。知陽氣復。寒氣去。故爲欲解。下利煩躁者。逆此。正勝邪微。雖煩下利必自止。

少陰病下利。若利自止。惡寒而踰臥。手足溫者可治。少陰病下利。惡寒踰臥。寒極而陰勝也。利自止。手足溫者。裏和。陽氣得復。故爲可治。

少陰病惡寒而踰。時自煩。欲去衣被者可治。

惡寒而踈。陰寒甚也。時時自煩。欲去衣被。爲陽氣得復。故云可治。

少陰中風。脉陽微陰浮者。爲欲愈。

少陰中風。陽脉當浮。而陽脉微者。表邪緩也。陰脉當沉。而陰脉浮者。裏氣和也。陽中有陰。陰中有陽。陰陽調和。故爲欲愈。

少陰病。欲解時。從子至寅上。

陽生於子。子爲一陽。丑爲二陽。寅爲三陽。少陰解於此者。陰得陽則解也。



少陰病吐利手足不逆冷反發熱者不死脉不至者灸少陰七壯。

經曰少陰病吐利躁煩四逆者死吐利手足不厥冷者則陽氣不衰雖反發熱不死脉不至者吐利暴虛也灸少陰七壯以通其脉。

少陰病八九日一身手足盡熱者以熱在膀胱必便血也。

膀胱太陽也少陰太陽爲表裏少陰病至八九日寒邪變熱復傳太陽太陽爲諸陽主氣熱在太陽。

故一身手足盡熱。太陽經多血少氣。爲熱所乘。則血散下行。必便血也。

少陰病。但厥無汗。而強發之。必動其血。未知從何道出。或從口鼻。或從目出。是名下厥上竭。爲難治。

但厥無汗。熱行於裏也。而強發汗。虛其經絡。熱乘經虛。迫血妄行。從虛而出。或從口鼻。或從目出。諸厥者。皆屬於下。但厥爲下厥。血亡於上。爲上竭。傷氣損血。邪甚正虛。故爲難治。

王宇泰云。但厥無汗。熱入裏而外寒甚也。當溫之。

而強發其汗則衛寒甚而汗不能出必內傷其  
血而妄行也。

少陰病惡寒身踈而利手足逆冷者不治。

針經曰多熱者易已多寒者難已此內外寒極純  
陰無陽故云不治。

少陰病吐利躁煩四逆者死。

吐利者寒甚於裏四逆者寒甚於表躁煩則陽氣  
欲絕是知死矣。

少陰病下利止而頭眩時時自冒者死。

下利止。則水穀竭。眩暈。則陽氣脫。故死。

少陰病四逆。惡寒而身踈。脉不至。不煩而躁者死。

四逆惡寒而身踈。則寒甚。脉不至。則真氣絕。煩。熱也。躁。亂也。若煩躁之躁。從煩至躁。爲熱來有漸。則猶可不煩而躁。是氣欲脫而爭也。譬猶燈將滅而暴明。其能久乎。

少陰病六七日。息高者死。

腎爲生氣之源。呼吸之門。少陰病六七日不愈。而息高者。生氣斷絕也。

少陰病脉微細沉但欲卧汗出不煩自欲吐至五日自利復煩躁不得卧寐者死

陰氣方盛至五六日傳經盡陽氣得復則愈反更自利煩躁不得卧寐則正氣弱陽不能復病勝藏故死

少陰病始得之反發熱脉沉者麻黃附子細辛湯主之

少陰病當無熱惡寒反發熱者邪在表也雖脉沉以始得則邪氣未深亦當溫劑發汗以散之

麻黃附子細辛湯方

第八十五

麻黃

二兩去節  
味甘熱

細辛

二兩味  
辛熱

附子

一枚炮去皮破  
八片味辛熱

右三味以水一斗先煮麻黃減二升去上沫內藥煮  
取三升去滓溫服一升日三服

內經曰寒淫於內治以甘熱佐以苦辛以辛潤之  
麻黃之甘以解少陰之寒細辛附子之辛以溫少  
陰之經

少陰病得之二三日麻黃附子甘草湯微發汗以二

三日無裏證故微發汗也。

二三日邪未深也。既無吐利厥逆諸裏證則可與麻黃附子甘草湯微汗以散之。

麻黃附子甘草湯方

〔第八十六〕

麻黃

二兩

甘草

二兩

附子

一枚炮去皮

右三味以水七升先煮麻黃一兩沸去上沫內諸藥煮取三升去滓溫服一升日三服。

麻黃甘草之甘以散表寒附子之辛以溫寒氣。

趙鶴真云仲景發汗湯劑各分輕重不同至少陰

發汗二湯其第一證以少陰本無熱。今發熱故云反也。蓋發熱爲邪在表而當汗。又兼脉沉屬陰而當溫。故以附子溫經。麻黃散寒而熱須汗解。故加細辛是汗劑之重者。第二證既無裏寒之可溫。又無裏熱之可下。求其所以用麻黃附子之義。則是脉亦沉。方可名曰少陰病。身亦發熱。方行發汗藥。又得之二三日。病尚淺。比之前證亦稍輕。故不重言脉證。而但曰微發汗。所以去細辛加甘草。是汗劑之輕者。



又云四逆生附配乾薑補中有發二湯熟附配  
黃發中有補

少陰病得之二三日以上心中煩不得卧黃連阿膠  
湯主之

脉經曰風傷陽寒傷陰少陰受病則得之於寒二  
三日已上寒極變熱之時熱煩於內心中煩不得  
卧也與黃連阿膠湯扶陰散熱

黃連阿膠湯方 第八十七

黃連 四兩味苦寒

黃芩 一兩味苦寒

芍藥 二兩味酸平

雞子黃

二枚味  
甘溫

阿膠

三兩味  
甘溫

右五味以水五升先煮三物取二升去滓內膠烱盡  
小冷內雞子黃攪令相得溫服七合日三服

陽有餘以苦除之黃芩黃連之苦以除熱陰不足  
以甘補之雞黃阿膠之甘以補血酸收也泄也芍  
藥之酸收陰氣而泄邪熱

少陰病得之一二日口中和其背惡寒者當灸之附  
子湯主之

少陰客熱則口燥舌乾而渴口中和者不苦不燥

是無熱也。背為陽，背惡寒者，陽氣衰，陰氣盛也。日無熱惡寒者，發於陰也。灸之助陽消陰，與附子湯溫經散寒。

附子湯方 第八十八

附子

二枚，去皮，味辛，熱。

茯苓

三兩，味甘，平。

人參

二兩，味甘，溫。

白朮

四兩，味甘，平。

芍藥

三兩，味酸，平。

右五味以水八升，煮取三升，去滓，溫服一升，日三服。

辛以散之，附子之辛以散寒，甘以緩之，茯苓人參白朮之甘以補陽，酸以收之，芍藥之酸以扶陰，所

以然者偏陰偏陽則爲病火欲實水當平之不欲偏勝也

王宇泰云背惡寒者陰寒氣盛此條是也又或陽氣內陷有背微惡寒者經所謂傷寒無大熱口燥渴心煩背微惡寒白虎加人參湯主之是也一爲陰寒氣盛一爲陽氣內陷當于口中潤燥辨之

少陰病身體痛手足寒骨節痛脉沉者附子湯主之少陰腎水而主骨節身體疼痛支冷脉沉者寒成於陰也身疼骨痛若脉浮手足熱則可發汗此手

足寒脉沉故當與附子湯溫經。

少陰病下利便膿血者桃花湯主之。

陽病下利便膿血者協熱也。少陰病下利便膿血者下焦不約而裏寒也。與桃花湯固下散寒。

桃花湯方 第八十九

赤石脂

一斤一斤全用。

乾薑

一兩味辛熱。

粳米

一升味甘平。

右三味以水七升煮米令熟去滓溫服七合。內赤石脂末方寸匕。三服。若一服愈餘勿服。

瀉可去脫。赤石脂之瀉以固腸胃。辛以散之。乾薑之辛以散裏寒。粳米之甘以補正氣。

少陰病二三日。至四五日。腹滿。小便不利。下利不止。便膿血者。桃花湯主之。

二三日。以至四五日。寒邪入裏深也。腹痛者。裏寒也。小便不利者。水穀不別也。下利不止。便膿血者。腸胃虛弱。下焦不固也。與桃花湯固腸止利也。

吳氏云。凡下血。便膿血。有陰陽冷熱之不同。古人云。見血無寒。又言血得熱而行。此大槩之言也。

畧曰陽證內熱則溢出鮮血陰證內寒則下紫黑如豚肝也

少陰病下痢便膿血者可刺。

下焦血氣留聚腐化則爲膿血刺之以利下焦宣通血氣。

少陰病吐利手足厥冷煩躁欲死者吳茱萸湯主之吐利手足厥冷則陰寒氣甚煩躁欲死者陽氣內爭與吳茱萸湯助陽散寒。

少陰病下痢咽痛胸滿心煩者猪膚湯主之。

少陰之脉從腎上貫肝膈入肺中循喉嚨其支別者從肺山絡心注胸中邪自陽經傳於少陰陰虛客熱下利咽痛胸滿心煩也與猪膚湯調陰散熱

猪膚湯方 〔第九十〕

猪膚一斤。味

右一味以水一斗煮取五升去滓加白蜜一升白粉五合熬香和相得溫分六服。

猪水畜也其氣先入腎少陰客熱是以猪膚解之加白蜜以潤燥除煩白粉以益氣斷利



少陰病二三日咽痛者可與甘草湯不差者與桔梗湯

陽邪搏於少陰邪熱爲咽痛服甘草湯則差若寒熱相傳爲咽痛者服甘草湯若不差與桔梗湯以和少陰之氣

甘草湯方

甘草

右一味以水三升煮取一升半去滓溫服七合日一服

桔梗湯方

第九十二

桔梗

一兩味辛  
非微溫

甘草

二兩味  
非平

右二味以水三升煮取一升去滓分溫再服。

桔梗辛溫以散寒甘草味非平以除熱甘草梗相合以調寒熱。

少陰病咽中傷生瘡不能語言聲不出者苦酒湯主之。

熱傷於絡則經絡乾燥使咽中生瘡不能言語聲不出者與苦酒湯以解絡熱愈咽瘡。

苦酒湯方

第九十三

半夏

洗破如棗核大十四枚味辛溫

雞子

一枚去黃內上苦酒煮雞子殼中其殼寒

右二味內半夏著苦酒中以雞子殼置刀環中安火上令三沸去滓少少含嚥之不差更作三劑服之

辛以散之半夏之辛以發音聲甘以緩之雞子之甘以緩咽痛酸以長之苦酒之酸以飲咽瘡

王宇泰云抄苦酒本草注曰醢而成氏復云苦酒之酸余則以爲名義俱乖安知酒之味苦者不可以已咽痛耶若嫌苦酒性熱則半夏湯更辛况此

味苦哉下文發字與欬字自相反

少陰病咽中痛半夏散及湯主之

甘草湯主少陰客熱咽痛桔梗湯主少陰寒熱相搏咽痛半夏散及湯主少陰客寒咽痛也

半夏散及湯方第七十四

半夏虎味辛溫 桂枝去皮味辛溫

甘草炙味辛平

已上三味各別搗篩已合治之白飲和服方寸匕日三服若不能散服者以水一升煎七沸內散一兩方寸匕更煎三沸下火令小冷少少嚥之

內經曰寒淫所勝平以辛熱佐以甘苦辛熱補之辛以散經寒甘草之甘以緩正氣

少陰病下利白通湯主之

少陰主水少陰客寒不能制水故自利也白通湯  
溫裏散寒

白通湯方 第九十五

葱白

四莖味辛溫

乾薑

一斤味辛熱

附子

一枚生用去皮破八片味辛熱

右三味以水三升煮取一升去滓分溫再服。

內經曰腎苦燥。急食辛以潤之。葱白之辛。以通陽氣。乾薑附子之辛。以散陰寒。

張兼善云。白通湯及白通加豬膽湯。真武湯。與通脈四逆湯。皆爲少陰下利而設。除用薑附相同。其餘之藥各異。何也。蓋少陰下利。寒氣已甚。非薑附則不能治。然下利之理無殊。而兼有之證不一。用藥故不同耳。

少陰病下利。脈微者。與白通湯。利不止。厥逆無脈。乾嘔。煩者。白通加豬膽汁湯主之。服湯。脈暴出者死。微

續者生。

少陰病下利脉微爲寒極陰勝與白通湯復陽散  
寒服湯利不止厥逆無脉乾嘔煩者寒氣太甚內  
爲格拒陽氣逆亂也與白通湯和猪膽汁湯以和  
之內經曰逆而從之從而逆之又曰逆者正治從  
者反治此之謂也服湯脉暴出者正氣因發泄而  
脫也故死脉微結者陽氣漸復也故生。

白通加猪膽汁方

第九十六

葱白

四莖

乾薑

一兩

附子

一枚生去  
皮破八片

人尿

五合味鹹寒

猪膽汁

一合味苦寒

已上三味以水三升煮取一升去滓內膽汁人尿和令相得分溫再服若無膽亦可用

內經曰若調寒熱之逆冷熱必行則熱物冷服下豎之後冷體既消熱性便發由是病氣隨愈嘔咳皆除情且不違而致大益此和人尿猪膽汁鹹苦寒物於白通湯熱劑中要其氣相從則可以去格拒之寒也

張兼善云白通湯用附子凡四錢惟真武湯一錢



熟用餘皆生用何也凡附子生用則溫經散寒  
熟則益陽除濕乾薑辛熱故佐生附爲用生薑辛  
溫少資熟附之功然白通等湯以下利爲重其真  
武湯證以寒濕爲先故用藥有輕重之殊耳

少陰病二三日不已至四五日腹痛小便不利四肢  
沉重疼痛自下利者此爲有水氣其人或欬或小便  
利或下利或嘔者真武湯主之

少陰病二三日則邪氣猶淺至四五日邪氣已深  
腎主水腎病不能制水水飲停爲水氣腹痛者寒

濕內甚也。四肢沉重疼痛。寒濕外甚也。小便不利。自下利者。濕勝而水穀不別也。內經曰。濕勝則濡泄。與真武湯益陽氣散寒濕。

真武湯方 第九十七

茯苓

三兩 味苦平

芍藥

三兩 味酸平

生薑

三兩 切 味辛溫

白朮

二兩 味苦溫

附子

一枚 炮 去皮 破八片 味辛熱

右五味以水八升。煮取三升。去滓。溫服七合。日三服。脾惡濕。甘先入脾。茯苓白朮之甘。以益脾逐水。寒淫所勝。平以辛熱。濕淫所勝。佐以酸平。附子芍藥

生薑之酸辛以溫經散濕。

後加減法。

若欬者加五味半升細辛乾薑各一兩。

氣逆欬者五味之酸以收逆氣水寒相搏則欬細辛乾薑之辛以散水寒。

若小便利者去茯苓。

小便利則無伏水故去茯苓。

若下利者去芍藥加乾薑二兩。

芍藥之酸泄氣乾薑之辛散寒。

若嘔者去附子。加生薑足前成半斤。

氣逆則嘔。附子補氣。生薑散氣。千金曰。嘔家多服生薑。此爲嘔家聖藥。

論云真武。北方水神也。水氣在心下。外帶表面屬陽。必應發散。故治以真武湯。青龍湯主太陽病。真武湯主少陰病。

少陰病。下利。清穀。裏寒外熱。手足厥逆。脈微欲絕。身反不惡寒。其人面赤色。或腹痛。或乾嘔。或咽痛。或利止。脈不出者。通脈四逆湯主之。

下利清穀手足厥逆脉微欲絕爲裏寒身熱不惡寒面色赤爲外熱此陰甚於內格陽於外不相通也與通脉四逆湯散陰通陽

通脉四逆湯方 第九十八

甘草

三兩

附子

大者一枚生用去皮破八片

乾薑

三兩強人可日兩

右三味以水三升煮取一升二合去滓分溫再服其脉卽出者愈

後加減法

面色赤者加葱九莖。

葱味辛以通陽氣。

腹中痛者去葱加芍藥二兩。

芍藥之酸通寒利腹中痛爲氣不通也。

嘔者加生薑二兩。

辛以散之嘔爲氣不散也。

咽痛者去芍藥加桔梗一兩。

咽中如結加桔梗則能散之。

利止脈不出者去桔梗加人參一兩。

利止脉不出者亡血也。加人參以補之。經曰脉微而利亡血也。四逆加人參湯主之。脉病皆與方相應者乃可服之。

王宇泰云方與四逆湯同但此倍乾薑耳。

少陰病四逆其人或欬或悸或小便不利或腹中痛或泄利下重者四逆散主之。

四逆者四肢不溫也。傷寒邪在三陽則手足必熱傳到太陰手足自溫。至少陰則邪熱漸深故四肢逆而不溫也。及至厥陰則手足厥冷是又甚於逆。

四逆散以散傳陰之熱也。

四逆散方——第九十九

甘草

炙，味平。

枳實

破，水漬，炙，乾，味苦寒。

柴胡

味苦，美。

芍藥

味酸，微寒。

右四味各十分，搗篩，白飲和服，方寸匕，日三服。

內經曰：熱淫於內，佐以甘苦，以酸收之，以苦發之。

枳實、甘草之甘，以泄裏熱；芍藥之酸，以收陰氣。

柴胡之苦，以發表熱。

後加減法。



欬者加五味子、乾薑各五分，并主下痢。

肺寒氣逆則欬，五味子之酸收逆氣，乾薑之辛散肺寒，并主下痢者，肺與大腸爲表裏，上欬下痢，治則頗同。

悸者加桂枝五分。

悸者，氣虛而不能通行，心下築築然悸動也。桂猶圭也，引導陽氣，若熱以使。

小便不利者，加茯苓五分。

茯苓味甘而淡，用以滲泄。

腹中痛者。加附子一枚。炮令拆。

裏虛遇邪則痛。加附子以補虛。

泄利下重者。先以水五升。煮薤白三升。煮取三升。去滓。以散三方寸七。內湯中。煮取一升半。分溫再服。

泄利下重者。下焦氣滯也。加薤白以泄氣滯。

論云。四肢者。諸陽之本。陽氣不足。陰寒加之。陽氣不相順接。是致手足不溫而成四逆。此湯中發陽氣。走散陰寒。溫經暖肌。故以四逆名。此奇制之大劑也。四逆屬少陰。少陰者腎也。腎肝位遠。非大劑

不能達。內經曰：遠而奇偶，制大其服。此之謂也。

少陰病，下利，六七日欬而嘔渴，心煩不得眠者，猪苓湯主之。

下利不渴者，裏寒也。經曰：自利不渴者，屬太陰，以其藏寒故也。此下利嘔渴，知非裏寒，心煩不得眠，知協熱也。與猪苓湯滲泄小便，分別水穀。經曰：復不止，當利其小便。此之謂歟。

少陰病得之二三日，口燥咽乾者，急下之。宜大承氣湯。

傷寒傳經五六日。邪傳少陰。則口燥舌乾而渴。爲邪漸深也。今少陰病。得之二三日。邪氣未深入之時。便作口燥咽乾者。是邪熱已甚。腎水乾也。急與大承氣湯下之。以全腎也。

少陰病。自利清水。色純青。心下必痛。口乾燥者。急下之。宜大承氣湯。

少陰。腎水也。青。肝色也。自利色青。爲肝邪乘腎。難經曰。從前來者爲實邪。以腎蘊實邪。必心下痛。口乾燥也。與大承氣湯。以下實邪。

少陰病六七日。腹脹不大便者。急下之。宜大承氣湯。  
此少陰入府也。六七日。少陰之邪入府之時。陽明  
內熱壅甚。腹滿不大便也。陽明病。土勝。腎水則乾。  
急與大承氣湯下之。以救腎水。

張兼善云。陽明與少陰皆有急下之條。然而證雖  
不同。其入府之理則一。是以皆用大承氣也。

王三陽云。少陰病。下利六七日。以下諸條。方是陽  
證。傳經之少陰也。

少陰病。脈沉者。急溫之。宜四逆湯。

既吐且利小便復利而大汗出下利清穀內寒外  
熱脉微欲絕者不云急溫此少陰病脉沉而云急  
溫者彼雖寒甚然而證已形見於外治之則有成  
法此初頭脉沉未有形證不知邪氣所之將發何  
病是急與四逆湯溫之

少陰病飲食入口則吐心中溫溫欲吐復不能吐始  
得之手足寒脉弦遲者此胸中實不可下也當吐之  
若膈上有寒飲乾嘔者不可吐也急溫之宜四逆湯  
傷寒表邪傳裏至於少陰少陰之脉從肺出絡心

注胸中邪既留於胸中而不散者飲食入其間則吐  
心中溫溫欲吐陽受氣於胸中邪既留於胸中則  
陽氣不得宣發於外是以始得之手足寒脉弦遲  
此是胸中實不可下而當吐其膈上有寒飲亦使  
人心中溫溫而手足寒吐物出噎則物不出吐  
與嘔別為胸中實則吐而物出若膈上有寒飲則  
但乾嘔而不吐也此不可吐可與四逆湯以溫其  
膈

王三陽云此少陰寒中陰經者也俱未入於腑

少陰病下利脉微漇漇而汗出必數更衣反少者當溫其上灸之

脉微爲亡陽漇漇爲亡血下利嘔而汗出亡陽亡血也津液不足裏有虛寒必數更衣反少者溫其上以助其陽也灸之以消其陰

辨厥陰病脉證并治第十二

厥陰之爲病消渴氣上撞心心中疼熱饑而不欲食食則吐虵下之利不止

邪傳厥陰則熱  
邪自太陽傳至太陰則



滿而盛乾未成渴也邪至少陰者口燥舌乾而渴  
未成消也至厥陰成消渴者熱甚能消水故也  
水多而小便少者謂之消渴木生於火肝氣通心  
厥陰客熱氣上撞心中疼熱傷寒六七日厥陰  
受病之時爲傳經盡則當入脾胃虛客熱饑不欲  
食或在胃中無食則動聞食嗅而出得食吐衄此  
熱在厥陰經也若便下之虛其胃氣厥陰木邪相  
乘必吐下不止

張卿子云素問陰證三條皆指傳邪故云已滿三

日可下而已。仲景三陰首條皆言病氣所謂傷寒本自寒下也太陰少陰易明唯厥陰條種種似熱故成氏注爲熱已深不知太陽篇中微熱清渴者五苓散則桂朮也又氣上衝胸身爲振振搖則大虛也厥陰寒疝亦氣上衝心又胸中陽氣微心中饑而煩平脉篇云氣微者心內饑饑而不欲食也又胃中冷則吐衄脾胃論虛勞則熱氣熏胸中又雜病心中疼熱多成膈氣宜吳茱萸湯蓋皆以不能化熱成陰玩下之利不止一句爽然矣成注

渴而渴清渴分淺深故云渴而至消爲熱甚試以  
少陰渴本文云虛故引水自救何曾較太陰不渴  
爲寢熱耶嘗見厥陰消渴數證舌盡紅赤厥冷脉  
微渴甚服白虎黃連等湯皆不救。

厥陰中風脉微浮爲欲愈不浮爲未愈。

經曰陰病見陽脉而生浮者陽也厥陰中風脉微  
浮爲邪氣還表向汗之時故云欲愈。

厥陰病欲解時從丑至卯上。

厥陰木也王於卯丑寅向王故爲解時。

厥陰病渴欲飲水者少少與之愈。

邪至厥陰爲傳經盡欲汗之時渴欲得水者少少與之胃氣得潤則愈。

諸四逆厥者不可下之虛家亦然。

四逆者四肢不溫也厥者手足冷也皆陽氣少而陰氣多故不可下虛家亦然下之是爲重虛金匱玉函曰虛者十補勿一瀉之。

傷寒先厥後發熱而利者必自止見厥復利。

陰氣勝則厥逆而利陽氣復則發熱利必自止。

厥則陰氣還勝而復利也。

張兼善云三陰傷寒太陰爲始則手足溫少陰則手足清厥陰則手足厥逆然病至厥陰乃陰之極也故反有發熱之理蓋陽極則陰生陰極則陽生此陰陽推盪必然之理也易云窮則變窮者至極之謂也陽至極而生陰故陽病有厥冷之證陰至極而生陽則厥逆者有發熱之條凡言厥深熱亦深者乃事之極而變之常經曰亢則害承乃制也傷寒始發熱六日厥反九日而利凡厥利者當不能

食今反能食者恐爲除中。食以索餅不發熱者知胃氣尚在。必愈。恐暴熱來出而復去也。後三日脉之。其熱續在者。期之。旦日夜半愈。所以然者。本發熱六日。厥反九日。復發熱三日。并前六日。亦爲九日。與厥相應。故期之。旦日夜半愈。後三日脉之。而脉數。其熱不罷者。此爲熱氣有餘。必發痙膿也。

始發熱邪在表也。至六日邪傳厥陰。陰氣勝者。作厥。而利。厥反九日。陰寒氣多。當不能食。而反能食者。恐爲除中。除去也。中。胃氣也。言邪氣大甚。除去

胃氣胃欲引食自救故暴能食此欲勝也食以  
餅試之若胃氣絕得麪則必發熱若不發熱者胃  
氣尚在也恐是寒極變熱因暴熱來而復去使之  
能食非除中也金匱要略曰病人素不能食而反  
暴思之必發熱後三日脉之其熱續在者陽氣脉  
也期之旦日夜半愈若旦日不愈後三日脉數而  
熱不罷者爲熱氣有餘必發瘧膿經曰數脉不時  
則生惡瘡

傷寒脉遲六七日而反與黃芩湯徹其熱脉遲爲寒

今與黃芩湯復除其熱腹中應冷。當不能食。今反能食此名除中必死。

傷寒脉遲六七日爲寒氣已深反與黃芩湯寒藥兩寒相搏腹中當冷冷不消穀則不能食反能食者除中也四時皆以胃氣爲本胃氣已絕故云必死。

傷寒先厥後發熱下利必自止而反汗出咽中痛者其喉爲痺發熱無汗而利必自止若不止必便膿血便膿血者其喉不痺。



傷寒先厥而利陰寒氣勝也寒極變熱後發熱下  
利必自止而反汗出咽中痛其喉爲痺者熱氣上  
行也發熱無汗而利必自止利不止必便膿血者  
熱氣下行也熱氣下而不上其喉亦不痺也。

王宇泰云厥而利發熱則利必止反汗出者亡陽  
也咽中痛熱上衝也亡陽則陰獨復會於熱則陰  
陽結而爲喉痺也內經曰一陰一陽結爲喉痺。

傷寒一二日至四五日而厥者必發熱前熱者後必  
厥厥深者熱亦深厥微者熱亦微厥應下之而反發

汗者必口傷爛赤

前厥後發熱者寒極生熱也。前熱後厥者陽氣內陷也。厥深熱深。厥微熱微。隨陽氣陷之深淺也。熱之伏深必須下去之。反發汗者引熱上行必口傷爛赤。內經曰火氣內發上爲口糜。

吳氏云傷寒一二日至四五日而發者必發熱。是傳經之邪。前熱後厥者亦傳經之邪。當以厥之微甚辨熱之深淺。若厥熱入腑而實者須下去之。若反發汗則胃中津液愈燥竭而熱故必口傷爛赤。

然經云諸四逆者不可下之。至此又云應下最宜。詳審先賢謂熱厥手足雖厥冷而或有溫時，手足雖逆冷而手足掌心必煖。戴院使又以指甲之煖冷別熱寒二厥。臨病之工慎之。

傷寒病厥五日熱亦五日，設六日當復厥不厥者自愈。厥終不過五日以熱五日故知自愈。

陰勝則厥，陽勝則熱。先厥五日，爲陰勝至六日，陽復勝，熱亦五日，後復厥者，陰復勝。若不厥，爲陽全勝，故自愈。經曰：發熱四日，厥反三日，復熱四日，厥

少熱多其病爲愈

凡厥者陰陽氣不相順接便爲厥厥者手足逆冷是也。

手之三陰三陽相接於手十指足之三陰三陽相接於足十指陽氣內陷陽不與陰相順接故手足爲之厥冷也。

傷寒脉微而厥至七八日膚冷其人躁無暫安時者此爲藏厥非爲虵厥也虵厥者其人當吐虵令病者靜而復時煩此爲藏寒虵上入膈故煩須臾復止得

食而嘔又煩者虵聞食臭出其人當自吐虵虵厥者  
烏梅圓主之又主久利方

藏厥者死陽氣絕也虵厥雖厥而煩吐虵已則靜  
不若藏厥而躁無暫安時也病人燕寒胃虛虵動  
上脘聞食臭出因而吐虵與烏梅圓溫藏安蟲

烏梅圓方

第一

烏梅

三百個  
味酸溫

細辛

六兩  
辛熱

乾薑

十兩  
辛熱

黃連

一觔  
苦寒

當歸

四兩  
辛溫

附子

六兩  
辛熱

蜀椒

四兩  
辛熱

桂枝

六兩  
辛熱

人參

六兩  
甘溫

黃蘗

六兩  
苦寒

右十味。異搗篩。合治之。以苦酒漬烏梅一宿。去核。蒸之五升米下。飯熟。搗成泥。和藥。令相得。內白中。與蜜杵二千下。圓如梧桐子大。先食飲服十圓。日三服。稍加至二十圓。禁生冷滑物臭食等。

肺主氣。肺欲收。急食酸以收之。烏梅之酸。以收肺氣。脾欲緩。急食甘以緩之。人參之甘。以緩脾氣。寒淫於內。以辛潤之。以苦堅之。當歸桂枝細辛之辛。以潤內寒。寒淫所勝。平以辛熱。薑附之辛熱。以勝

寒。或得甘則動。得苦則安。黃連黃蘗之苦。以安乾  
傷寒。熱少厥微。指頭寒。默默不欲食。煩躁數日。小便  
利。色白者。此熱除也。欲得食。其病爲愈。若厥而嘔。胸  
脇煩滿者。其後必便血。

指頭寒者。是厥微熱少也。默默不欲食。煩躁者。邪  
熱初傳裏也。數日之後。小便色白。裏熱去。欲得食。  
爲胃氣已和。其病爲愈。厥陰之脈。挾胃貫膈。布脇  
肋。厥而嘔。胸脇煩滿者。傳邪之熱甚於裏也。厥陰  
肝主血。後數日。熱不去。又不得外泄。迫血下行。必

致便血。

王宇泰云，設未欲食，宜乾薑甘草湯，嘔而胸脇煩滿者，少陽證也。少陽與厥陰爲表裏，邪干其腑，故嘔而胸脇煩滿也。肝主血，故後必便血。

病者手足厥冷，言我不結胸，小腹滿，按之痛者，此冷結在膀胱關元也。

手足厥，不結胸者，無熱也。小腹滿，按之痛，下焦冷結也。

吳氏云，小腹滿，俱是熱病，惟冷結膀胱一證爲寒。



有手足厥冷可辦。

又云小瀉下焦所治當膀胱上口至分別清濁或用真武湯。

傷寒發熱四日厥反三日復熱四日厥少熱多其病當愈四日至七日熱不除者其後必便膿血。

先熱後厥者陽氣邪傳裏也發熱爲邪氣在表至四日後厥者傳之陰也後三日復傳陽經則復熱厥少則邪微熱多爲陽勝其病爲愈至七日傳經盡熱除則愈熱不除者爲熱氣有餘內搏厥陰之

血其後必大便膿血。

傷寒厥四日熱反三日復厥五日其病爲進寒多熱少陽氣退故爲進也。

傷寒陰勝者先厥至四日邪傳裏重陰必陽邪熱三日七日傳經盡當愈若不愈而復厥者傳作再經至四日則當復熱若不復熱至五日厥不除者陰勝於陽其病進也。

傷寒六七日脉微手足厥冷煩躁灸厥陰厥不還者死。

傷寒六七日則正氣當復邪氣當罷脉浮身熱爲欲解若反脉微而厥則陰勝陽也煩躁者陽虛而爭也灸厥陰以復其陽厥不還則陽氣已絕不能復正而死

傷寒發熱下利厥逆躁不得臥者死

傷寒發熱邪在表也下利厥逆陽氣虛也躁不得臥者病勝藏也故死

傷寒發熱下利至甚厥不止者死

金匱要略曰六腑氣絕於外者手足寒五臟氣絕

於內者利下不禁傷寒發熱爲邪氣獨甚下利至甚厥不止爲腑臟氣絕故死

傷寒六七日不利便發熱而利其人汗出不止者死有陰無陽故也

傷寒至七日爲邪正爭之時正勝則生邪勝則死始不下利而暴忽發熱下利汗出不止者邪氣勝正陽氣脫也故死

傷寒五六日不結胸腹濡脉虛復厥者不可下此爲亡血下之死

傷寒五六日邪氣當作裏實之時若不結胸而腹濡者裏無熱也脉虛者亡血也復厥者陽氣少也不可下下之爲重虛故死金匱玉函曰虛者重瀉真氣乃絕

發熱而厥七日下利者爲難治

發熱而厥邪傳裏也至七日傳經盡則正氣勝邪當汗出而解反下利則邪氣勝裏氣虛則爲難治傷寒脉促手足厥逆者可灸之

脉促則爲陽虛不相續厥逆則爲陽虛不相接灸

之以助陽氣

王三陽云厥逆則爲陽虛陽虛二字當作陰勝二字必有差訛

傷寒脉滑而厥者裏有熱也白虎湯主之

滑爲陽厥氣內陷是裏熱也與白虎湯以散裏熱也

手足厥寒脉細欲絕者當歸四逆湯主之

手足厥寒者陽氣外虛不溫四末脉細欲絕者陰血內弱脉行不利與當歸四逆湯助陽生陰也

當歸四逆湯方

第一百二

當歸

三兩 辛溫

桂枝

三兩 辛熱

芍藥

三兩 酸寒

細辛

二兩 辛熱

大棗

二十五 餹甘溫

甘草

二兩 炙甘平

通草

二兩 甘平

右七味以水八升煮取三升去滓溫服一升日三服

內經曰脉者血之腑也諸血者皆屬心通脉者必先補心益血苦先入心當歸之苦以助心血心苦緩急食酸以收之芍藥之酸以收心氣肝苦急急食甘以緩之大棗甘草通草之甘以緩陰血

若其人內有久寒者宜當歸四逆加吳茱萸生薑湯主之

茱萸辛溫以散久寒生薑辛溫以行陽氣

四逆加吳茱萸生薑湯方

第一百二

當歸

三兩

芍藥

三兩

甘草

二兩

通草

二兩

桂枝

三兩

細辛

三兩

生薑

半斤

大棗

二十五枚

吳茱萸

二升

右九味以水六升清酒六升和煮取五升去滓溫分五服一方水酒各四升



大汗出熱不去內拘急四肢疼又下利厥逆而惡寒者四逆湯主之。

大汗出則熱當去熱反不去者亡陽也內拘急下利者寒甚於裏四肢疼厥逆而惡寒者寒甚於表與四逆湯復陽散寒。

大汗若大下利而厥冷者四逆湯主之。

大汗若大下利內外雖殊其亡津液損陽氣則一也陽虛陰勝故生厥逆與四逆湯固陽退陰。

病人手足厥冷脈乍緊者邪結在胸中心中滿而煩。

饑不能食者病在胸中當須吐之宜瓜蒂散。

手足厥冷者邪氣內陷也脉緊牢者爲實邪氣入  
腑則脉沉今脉乍緊知邪結在胸中爲實故心下  
滿而煩胃中無邪則喜饑以病在胸中雖饑而不  
能食與瓜蒂散以吐胸中之邪。

傷寒厥而心下悸者宜先治水當服茯苓甘草湯却  
治其厥不爾水漬入胃必作利也。

金匱要略曰水停心下甚者則悸厥雖寒勝然以  
心下悸爲水飲內甚先與茯苓甘草湯治其水而

後治其厥。若先治厥，則水飲浸漬，人胃必作下利。傷寒六七日，大下後，寸脈沉而遲，手足厥逆，下部脈不至，咽喉不利，唾膿血，泄利不止者，爲難治。麻黃升麻湯主之。

傷寒六七日，邪傳厥陰之時，大下之後，下焦氣虛，陽氣內陷，寸脈遲，而手足厥逆，下部脈不至，厥陰之脈貫膈，上注肺，循喉嚨，在厥陰，隨經射肺，因亡津液，遂成肺痿，咽喉不利，而吐膿血也。金匱要略曰：肺痿之病，從何得之？被快藥下利，重亡津液，故

得之若泄利不止者。為裏氣大虛。故云難治。與麻黃升麻湯以調肝肺之氣。

麻黃升麻湯方 第一百三

麻黃

二兩半。去節。甘溫。

升麻

一兩一分。甘平。

當歸

一兩一分。辛溫。

知母

苦寒。

黃芩

苦寒。

姜豉

甘平。各十八銖。

石膏

碎。綿裹。甘寒。

白朮

甘溫。

乾薑

辛熱。

芍藥

酸平。

天門冬

去心。甘平。

桂枝

辛熱。

茯苓

甘平。

甘草

炙。甘平。各六銖。

右十四味。以水一斗。先煮麻黃一兩。沸去上沫。內諸

藥煮取三升。分溫三服。相去如炊三斗米頃。令盡汗出愈。

玉函曰大熱之氣寒以取之甚熱之氣以汗發之麻黃升麻之甘以發浮熱正氣虛者以辛潤之當歸桂枝之辛以散寒上熱者以苦泄之知母黃芩之苦涼心去熱津液少者以甘潤之茯苓白朮之甘緩脾生津肺燥氣熱以酸收之以甘緩之芍藥之酸以斂逆氣麥門冬石膏甘草之甘潤肺除熱。

傷寒四五日。腹中痛。若轉氣下。趣少腹者。此欲自利也。

傷寒四五日。邪氣傳裏之時。腹中痛。轉氣下。趣少腹者。裏虛。遇寒。寒氣下行。欲作自利也。

傷寒本自寒下。醫復吐之。寒格更逆吐下。若食入口卽吐。乾薑黃連黃芩人參湯主之。

傷寒邪自傳表。爲本自寒下。醫反吐下。損傷正氣。寒氣內爲格拒。經曰。格則吐逆。食入口卽吐。謂之寒格。更復吐下。則重虛而死。是更逆吐下。與乾薑

黃連黃芩人參湯以通寒格。

王宇泰云按本自寒下恐是本自吐下玩復字可見蓋胃寒則吐下寒則利胃寒者不宜吐醫反吐之則傷胃氣遂成寒格下文文氣不貫當有關文。張卿子云本自寒下如少陽一條邪高痛下所謂邪正分爭蓋本爲寒而邪爲熱素問云風寒在下燥熱在上。

乾薑黃連黃芩人參湯方 第一百四

乾薑

辛熱  
皮二兩

黃連

三兩  
須苦寒

黃芩

三兩  
苦寒

人參

三兩  
其溫

右四味以水六升煮取二升去滓分溫再服

辛以散之甘以緩之乾薑人參之甘辛以補正氣  
苦以泄之黃連黃芩之苦以通寒格

下利有微熱而渴脈弱者令自愈

下利陰寒之疾反大熱者逆有微熱而渴裏氣方  
溫也經曰諸弱發熱脈弱者陽氣得復也令必自  
愈

下利脈數有微熱汗出令自愈設復緊爲未解



下利陰病也。脈數陽脈也。陰病見陽脈者生。微熱汗出陽氣得通也。利必自愈。諸緊爲寒。設復脈緊陰氣猶勝。故云未解。

下利手足厥冷無脈者。灸之不溫。若脈不還反微喘者死。

下利手足厥逆無脈者。陰氣獨勝。陽氣大虛也。灸之陽氣復。手足溫而脈還爲欲愈。若手足不溫脈不還者。陽已絕也。反微喘者。陽氣脫也。

少陰負趺陽者爲順也。

少陰腎水，跌陽脾土。下利爲腎邪干脾，水不勝土，則爲微邪，故爲順也。

下利寸脈反浮數，尺中自濇者，必清膿血。

下利者，脈當沉而遲，反浮數者，裏有熱也。濇爲無血，尺中自濇者，腸胃血散也。隨利下，必便膿血，清與固通，脈經曰：清者，溲也。

下利清穀，不可攻表，汗出必脹滿。

下利者，脾胃虛也。胃爲津液之主，發汗亡津液，則胃氣愈虛，必脹滿。

下利脉沉弦者下重也脉大者爲未止脉微弱數者爲欲自止雖發熱不死

沉爲在裏弦爲拘急裏氣不足是主下重大則病進此利未止脉微弱數者邪氣微而陽氣復爲欲自止雖發熱止由陽勝非大逆也

下利脉沉而遲其人面少赤身有微熱下利清穀者必鬱冒汗出而解病人必微厥所以然者其面戴陽下虛故也

下利清穀脉沉而遲裏有寒也面少赤身有微熱

表未解也。病人微厥，鍼經曰：下虛則厥。表邪欲解，臨汗之時，以裏先虛，必鬱冒，然後汗出而解也。下利，脈數而渴者，令自愈。設不差，必清膿血，以有熱故也。

經曰：脈數不解，而下不止，必協熱便膿血也。

下利後，脈絕，手足厥冷，辟時脈還，手足溫者生；脈不還者死。

下利後，脈絕，手足厥冷者，無陽也。辟時，周時也。周時，厥愈，脈出，爲陽氣復，則生。若手足不溫，脈不還。

者爲陽氣絕則死。

傷寒下利日十餘行脉反實者死。

下利者裏虛也脉當微弱反實者病勝藏也故死。  
難經曰脉不應病病不應脉是爲死病。

下利清穀裏寒外熱汗出而厥者通脉四逆湯主之。  
下利清穀爲裏寒身熱不解爲外熱汗出陽氣通行於外則未當厥其汗出而厥者陽氣太虛也與通脉四逆湯以固陽氣。

熱利下重者白頭翁湯主之。

利則津液少。熱則傷氣。氣虛下利致後重也。與白頭翁湯散熱厚腸。

白頭翁湯方

第一百五

白頭翁

三兩苦寒

黃連

三兩去須苦寒

黃柏

三兩去皮苦寒

秦皮

三兩苦寒

右四味以水七升。煮取二升。去滓。溫服一升。不愈更服一升。

內經曰。腎欲堅。急食苦以堅之。利則下焦虛。是以純苦之劑堅之。

下利腹脹滿身體疼痛者先溫其裏乃攻其表溫裏  
四逆湯攻表桂枝湯

下利腹滿者裏有虛寒先與四逆湯溫裏身疼痛  
爲表未解利止裏和與桂枝湯攻表

下利欲飲水者以有熱故也白頭翁湯主之

自利不渴爲藏寒與四逆湯以溫藏下利飲水爲  
有熱與白頭翁湯以涼中

羅天益云少陰自利而渴乃下焦虛寒而用四逆  
者恐不可以渴不渴分熱寒也正當以小便黃白

別之耳

下利澀語者有燥屎也宜小承氣湯。

經曰實則澀語有燥屎爲胃實下利爲腸虛與小承氣湯以下燥屎。

下利後更煩按之心下濡者爲虛煩也宜梔子豉湯。  
下利後不煩爲欲解若更煩而心下堅者恐爲谷煩此煩而心下濡者是邪熱乘虛客於胸中爲虛煩也與梔子豉湯吐之則愈。

嘔家有癰膿者不可治嘔膿盡自愈。



胃脘有癰則嘔而吐膿不可治嘔得膿盡嘔亦自愈

嘔而脉弱小便復利身有微熱見厥者難治四逆湯主之

嘔而脉弱爲邪氣傳裏嘔則氣上逆而小便當不利小便復利者裏虛也身有微熱見厥者陰勝陽也爲難治與四逆湯溫裏助陽

乾嘔吐涎沫頭痛者吳茱萸湯主之

乾嘔吐涎沫者裏寒也頭痛者寒氣上攻也與吳

柴萸湯溫裏散寒

嘔而發熱者小柴胡湯主之

經曰嘔而發熱者柴胡證具

傷寒大吐大下之極虛復極汗出者以其人外氣拂鬱復與之水以發其汗因得嘔所以然者胃中寒冷故也

大吐大下胃氣極虛復極發汗又亡陽氣外邪怫鬱於表則身熱醫與之水以發其汗胃虛得水虛寒相搏成嘔也

或云吳茱萸湯理中湯

活人云橘皮乾薑湯。羌活附子散。半夏生薑湯。退陰散。

傷寒噦而腹滿。視其前後。知何部不利。利之則愈。  
噦而腹滿。氣上而不下也。視其前後部有不利者。  
利之。以降其氣。前部小便也。後部大便也。  
活人云。前部宜猪苓湯。後部宜調胃承氣湯。